

Oktòb 2011

konferans jeneral

Nou tout anwole

sèvis misyonè

Satan

diyite

konferans jeneral

Nou tout anwole

Pa Eldè Jeffrey R. Holland

Nan Kolèj Douz Apot yo

Mwen mande chak gason, granmoun oubyen jèn, ki detni prèttriz la, pou yo gen yon vwa pi fò ak pi devwe ... yon vwa pou sa ki byen, yon vwa ki pale pou levanjil la, yon vwa pou Bondye.

Nan espri kantik emouvan remakab sa a e avèk priyè elokan Richard G. Hinckley a nan kè mwen, mwen ta renmen pale yon fason ase franch aswè a, frè m yo, e m ap enkli nan franpale a jènjan yo nan Prèttriz Arawon an.

Lè nou pale de esplandè Premye Vizyon Joseph Smith la, pafwa nou pase sou silans konfwontasyon menasan ki te fèt jis anvan sa a, yon konfwontasyon nan bi pou detwi jèn gason an si posib men, de tout fason, pou bloke revelasyon ki ta pral vini an. Nou pa pale de advèsè a plis ke nou oblije, e m pa renmen pale de li ditou, men, eksperyans jèn Jospèh la raple nou sa chak gason, ki enkli chak jènjan yo nan asanble sa a, bezwen sonje.

Premyèman, Satan, oswa Lisifè, oswa Papa tou manti yo---rele l jan nou vle---egziste, li se pèsonifikasyon mal la menm. Nan chak ka, entansyon li malveyan, epi li pran kriz chak fwa limyè redanmtè a parèt, devan menm ide laverite. Dezyèmman, li etènèlman an opozisyon avèk lanmou Bondye, Ekspyasyon Jezikri a, ak travay lapè ak sali a. L ap konbat bagay sa yo kèlkeswa lè ak kèlkeswa kote li kapab. Li konnen l ap fini pa pèdi

bagay la epi y ap chase l alafen, men, li decide pou mennen otan moun li kapab nan destriksyon l lan.

Konsa, ki taktik dyab la itilize nan batay sa a kote lavi etènèl an danje a? La ankò, gen yon leson nan eksperyans boskè sakre a. Joseph rakonte ke nan yon efò pou bloke tout sa k te gen pou rive yo, Lisifè te egzèse sou li “yon pouvwa etonan, se kòm si l te mare lang mwen epi m pa t kapab pale.”¹

Jan Prezidan Boyd K. Packer te anseye maten an, Satan pa ka dirèkteman pran lavi yon moun. Sa se youn nan anpil bagay li pa kapab fè. Men aparaman, efò li pou bloke travay la ap gen kèk rezilta si l ka jis mare lang moun fidèl yo. Frè m yo, si se konsa, aswè a m ap chèche gason jèn ak granmoun ki santi yo konsène ase pa batay ant byen ak mal sa a pou anwole nou epi louvri bouch nou. Nou nan lagè, epi pou kèk minit k ap vini yo, m ta renmen rekrute moun pou rantre nan batay la.

Èske m oblije fredone kèk pawòl nan kantik “Nous voici tous enrôlés” a? Nou konn kouplè ki di: “N ap tann nouvo solda; kiyès ki ap volontè?”² Evidaman, gwo bagay nan apèl pou pran lèzàm sa a sèke nou *pa* mande volontè yo pou tire fizi ni lanse grenad. Non, nou vle batayon ki pral pran pou zam yo “chak pawòl ki soti nan bouch Bondye.”³ Konsa, aswè a, m ap chèche misyonè ki pa p volontèman mare lang yo men ki, avèk Lespri Senyè a ak pouvwa prèttriz yo a, ap louvri bouch yo epi pale de mirak. Premye apot yo te anseye ke, kalite diskou sa a t ap sèvi kòm mwayen pou “bagay ki pi puisan [lafwa yo] te, epi ap akonpli.”⁴

Mwen espesyalman mande jènjan nan prèttriz Arawon yo pou redrese yo e pote atansyon. Pou nou menm, kite m fè yon konparezon avèk espò. Se nan yon batay lavi ou lanmò nou ye la a, jènjan yo, konsa, mwen pral rapwoche vizaj mwen de pa nou, kole avèk nen nou, avèk jis ase dife nan vwa mwen pou fè sousi nou wouji---menmjan yon antrenè fè lè match la sere epi vikwa a enpòtan. Epi, avèk match la k ap jwe a, sa antrenè a ap eseye di nou, sèke, pou nou jwe match sa a, kèk nan nou ap oblije moralman pi pwòp pase yo ye jodia. Nan batay ant byen ak mal sa a, nou pa ka jwe pou advèsè a chak fwa yon tantasyon vini, epi apresya espere n ap prepare pou konbat pou Kris la nan tanp ak nan misyon kòm si pa t gen anyen k te pase. Bondye p ap tolere pou nou moke li.

Kidonk nou devan yon dilèm aswè a, ou menm avèk mwen. Sèke gen santèn dè milye jèn gason nan laj Prèttriz Arawon an ki deja nan rejis Legliz sa a ki konstitye rezèvwa kandida nou pou fiti sèvis misyonè. Men pwoblèm nan se fè dyak, enstriktè, ak prèt sa yo rete ase aktif ak diy pou yo òdone ansyen e sèvi kòm misyonè. Konsa nou bezwen pou jèn gason yo ki deja nan ekip la *rete* ladan epi sispann drible kite teren an nan moman menm nou bezwen pou yo bay tout enèji yo nan jwèt la! Nan prèske tout konpetisyon atletik mwen konnen, gen limit ki trase atè a oubyen sou teren an kote chak patisipan dwe

rete pou yo ka patisipe nan konpetisyon an. Enben, Senyè a trase limit diyite pou moun ki aple pou travay avèk li yo nan chan sa a. Okenn misyonè ki pa repanti pou tèt pa yo pou peche seksyèl oswa langaj pwofàn oubyen pònografi pa ka al mande lòt moun pou yo repanti pou menm bagay sa yo! Nou pa ka fè sa. Lespri a p ap avèk nou epi mo yo ap trangle nan gòj nou lè n ap pwononse yo. Nou pa ka vwayaje sou sa Leyi rele “wout entèdi”⁵ yo epi espere ke na pral gide lòt moun nan “chemen etwat ak kwense”⁶ a; sa enposib.

Men, gen yon repons pou nou chak pou pwoblèm sa a menmjan genyen l pou envestigatè sa a ou pral rankontre a. Kèlkeswa moun ou ye e kèlkeswa sa ou te fè, ou kapab jwenn padon. Nou chak, jènjan yo, kapab kite tout transgresyon k ap trakase nou yo dèyè nou. Sa se mirak padon an; se mirak Ekspyasyon Senyè Jezikri a. Men nou pa ka fè sa san yon angajman aktif nan levanjil la, e nou pa ka fè li san repantans kote sa nesesè. M ap mande nou, jènjan yo, pou nou rete aktif e rete pwòp. Si sa nesesè, m ap mande nou pou nou *vin* aktif epi *vin* pwòp.

Frè m yo, nou pale franchman avèk nou paske pale avèk sibtilite sanble pa fonksyone. Nou pale franchman paske Satan se yon èt reyèl ki detèmine pou detwi nou, e nou konfwonte avèk li plis an plis pi bonè nan lavi a. Konsa, nou pran ou nan kòlèt chemiz ou epi nou rele osifò nou kapab:

Ecoutez! Sonner bien haut et clair (Tande son batay la, byen wo byen klè)
*Rassemblez vous autour de la croix! (An nou rasanble)*⁷

Jèn zanmi m yo, nou bezwen dè dizèn milye misyonè anplis nan mwa ak ane k ap vini yo. Yo dwe soti nan yon pousantaj detantè grandisan nan Prètriz Arawon an ki pral resevwa òdinasyon, ki pral rete aktif, pwòp, ak diy pou sèvi.

Pou sila nan pami nou yo ki te sèvi oswa k ap sèvi kounyeya, mèsè pou byen nou te fè ak pou lavi moun nou te touche! Se pou nou beni! Nou rekonèt tou ke gen kèk jènjan ki te espere tout lavi yo pou yo sèvi yon misyon men, pou rezon sante oswa lòt obstak ki pa depann de yo, pa kapab fè li. Nou rann piblikman e fyèman omaj ak gwoup sa a. Nou konnen dezi ou, e nou felisite w pou devouman ou. Nou renmen ou e admire ou. Ou “nan ekip la” e w ap toujou ladan, menmsi ou onorableman dispanse pou sèvis aplentan an. Men nou bezwen rès lòt yo!

Kounyeya, nou menm, frè yo nan prètriz Melkisedèk la, pa ri ni pa chita byen konfòtab nan chèz nou. M poko fini. Nou bezwen dè milye koup pou sèvi nan misyon yo nan legliz la. Chak prezidan misyon ap mande yo. Tout kote yo sèvi, koup nou yo pote yon matirite ak siksè nan travay la ke okenn kantite jèn 19 an pa ka pote, kèlkeswa jan yo bon.

Pou ankouraje plis koup sèvi, Premye Prezidans la ak Kolè Douz yo te fè youn nan bagay ki pi oze ak pi jenere ki te janm egziste nan travay misyonè a nan 50 dènye ane yo. Nan mwa Me ane sa a, dirijan prètriz yo nan domèn nan te resevwa nouvèl ke pri kay pou koup yo (e n ap pale de pri kay *sèlman*) ap kouvri pa fon misyonè legliz la si pri a depase yon montan ki te deja detèmine. Ala yon benediksyon! Sa se yon èd ki soti nan syèl la pou kouvri pi gwo depans koup yo genyen pou fè nan misyon yo. Frè yo te deside tou ke koup misyonè yo ka sèvi pou 6 oswa 12 mwa, oubyen pou 18 oswa 24 mwa tradisyonèl yo. Nan yon lòt jès mèveye, yo bay koup yo pèmision pou yo ka, sou frè pa yo, fè ti retounen lakay yo pou evenman famiyal enpòtan yo. Epi, sispann fè sousi paske nou pral fè pòtapòt oswa gen menm orè avèk jèn timoun 19 an yo! Nou pa mande nou pou nou fè sa, men, nou gen anpil lòt bagay nou ka fè, ak anpil libète sou fason pou nou fè yo.

Frè m yo, akòz pwoblèm sante, famiyal, oswa ekonomik, kèk nan *nou* gen dwa pa kapab ale kounyeya ou petèt jamè. Men, avèk yon ti planifikasyon, anpil nan nou kapab.

Evèk yo ak prezidan pye yo, pale sou bezwen sa a nan konsèy nou yo ak konferans nou yo. Pandan nou chita sou estrad la, nan reyinyon nou yo, gade asanble a, nan espri lapriyè, pou nou ka jwen enspirasyon pou wè ki koup ki ta dwe resevwa yon apèl. Apresa pale avèk yo epi ede yo fikse yon dat pou sèvi. Frè m yo, lè sa rive, di madanm nou ke, si nou ka kite dodin nou ak rimòt kontwòl televizyon an pou kèk mwa, yo ka kite pitit pitit yo tou. Timoun presye sa yo pa p gen okenn pwoblèm, e mwen pwomèt nou ke nou pral fè bagay pou yo nan sèvis Senyè a ke, nou pa t ap janm ka fè si nou te rete lakay nou pou kouve yo. Ki pi gwo kado granparan yo kapab bay posterite yo pase di an pawòl ak aksyon: “Nan fanmi sa a nou sèvi misyon!”

Travay misyonè a se pa sèl bagay nou bezwen nan gwo legliz mondyal mèveye sa a. Men prèske tout lòt bagay nou bezwen fè depann de moun ki tande levanjil Jezikri a pou lapremyè fwa epi ki rantre nan legliz la. Asireman, se poutèt sa misyon final Jezi te konfyè Douz yo sete travay debaz sa a---pou “ale tout kote, epi anseye tout nasyon yo, batize yo nan non Papa a, ak pitit gason an, ak Sentespri .”⁸ Apresa, e sèlman apresa, rès benediksyon levanjil yo totalman vini---solidarite famiyal, pwogram pou jèn yo, pwomès prètriz yo, ak òdonans ki mennen nan tanp yo. Men jan Nefi te temwaye a, okenn nan bagay sa yo pa ka fèt si yon moun pa “antre nan pòt . . . la.”⁹ Avèk tout sa ki gen pou fèt sou chemen lavi etènèl la, nou bezwen plis misyonè pou ouvri pòt sa a ede lòt moun franchi li.

M ap mande chak gason, timoun kou granmoun, ki detni prètriz la, pou yo tounen yon vwa pi fò ak pi devwe nan levanjil la, non sèlman kont mal ak moun ki pèsionifye mal la, men yon vwa pou sa ki byen, yon vwa pou Bondye. Frè m yo, nan tout laj, delye lang nou epi gade pawòl nou yo k ap fè mèvèy nan lavi moun “ki rete lwen verite a sèlman paske yo pa konnen kote pou yo jwenn ni.”¹⁰

*Nous voici tous enrôlés pour le grand combat;
Du mal et des dangers nous serons les vainqueurs.
Serrons les rangs autour du drapeau!
Gaiement avançons, Rentrons joyeux au foyer.¹¹*

Nan non Jezikri, Mèt nou, amèn.

Nòt

1. Joseph Smith---Istwa 1:15.
2. “Nous voici tous enrôlés,” *Cantiques*, no. 161.
3. Doktrin ak Alyans 84:44; gade tou Detewonòm 8:3; Matye 4:4.
4. *Lectures on Faith* (1985), 73.
5. 1 Nefi 8:28
6. 2 Nefi 31:18
7. *Cantiques* no. 161.
8. Matye 28:19.
9. 2 Nefi 33:9.
10. Doktrin Ak Alyans 123:12.
11. *Cantiques*, no. 161.